



INAKI VERGARA

Landa turismoko etxeetara hurbildu direnak ere ez dira gutxi izan aurtengo udan.



LUCA BRUNO / AP

Eguraldi kaxkarraren eraginez hondartzak hutsik izan dira aurtan.

Donostiako Zaragoza Plaza eta Avenida hoteletan ere datu hori baieztatu digute, nahiz eta orokorrean balorazio ona egin duten bisitari kopuruaren alde-tik. Zaragoza Plaza hotelak, esaterako, %90ean bete ditu bere gelak eta Frantzia, Alemania, Italia eta Estatu Batuetatik iritsi diren bisitariak asko izan direla esan digute.

Donibane Garaziko Plaza Berrri hotelean, berriz, ekaineko balorazio positiboaren aldean, uztailan izandako %30aren beherakada nabarmendu digute, iazkodatuaren aldean. Abuztuan, iazko datuen antzera, balorazioa positiboa izan da.

Datu aipagarrien artean, aurtengo udan mediterraneo aldetik iritsitako lagun kopuruaren hazkundera nabarmendu digute, euren iritziz «gauza berria da». Bestalde, Santiagoko bidea dela eta, «urtero, martxotik aurrera mugimendua» egoten dela gaineratu dute.

Landa turismoko etxeak beterik

Landa turismoko etxeetara oporretan joateko aukera egin duten lagunak asko izan dira aurtan ere. Urdaibaiko erreserba naturalean dagoen Arboliz Etxean esan digutenez, uda osoan beterik izan dituzte gela guztiak, deitu duten lagunak kopuruan beherakada nabaritu duten arren. Batik bat, Euskal Herri osotik, Madrilatik eta Bartzelonatik etorritako familiak izan dituzte aurtan, frantziar eta italiarren bat ere izan duten arren.

KANPINAK

«Ahazteko moduko urtea izan da aurtengoa»

Eguraldia aipatu behar da kanpinek izan duten beherakadaren faktore nagusitzat aurtengo udan. Izan ere, ostalaritza arloko beste sektoreei ez bezala kalte handia egin die Euskal Herriko kanpin gehienei udako eguraldi kaxkarrak. Donibane Lohizuneko Bord de la Mer kanpineko arduradunak argi utzi digu, kanpin arloan dihardutenentzat, «ahazteko moduko urtea»

izan dela. «Eguraldiagatik jende askok alde egin du, noski, ez zeuden pozik», adierazi digute. Balorazio bera egin digute Zarauzko Talai Mendi kanpinean ere. Euren iritziz «eguraldiak oso jende gutxi hurbiltzea eragin du», eta, orokorrean, surflariak eta gazte jendea izan direla atzera bota ez diren bakarrenetakoak.

Salbuespen modura, Lizarrako kanpina aipa genezake. Izan ere, Iruñeritik hegoaldera izandako eguraldi eguzkitsuak jende asko erakarri du bertara. Hango arduradunak azaldu digunez, «kanpinak zabalik daramatzan 13 urteetatik jende gehien izan dugun urtea izan da».



JON HERNÁEZ / ARGAZKI PRESS

Eguraldiak gehien kaltetu duen sektorea kanpinena izan da aurtan, zalantzarik gabe.

Bertako parajeak ezagutzeko ibilaldiez gain, Donostia edo inguruko herriak ezagutzera jo dute gehienek.

Aramaion kokaturiko Unzuetako baserriko arduradunek, berriz, jende kopuruaren beherakada izan dutela nabarmendu digute. Eguraldiagatik, beste urteetan etorritako bisitarien erdia baino ez da hurbildu aurtan, adierazi digute. Hala ere, ez dira gutxi izan bertara lasaitasun bila hurbildu direnak, iaz baino gutxiago izan diren arren. Gehienek, inguruko mendietan ibiltzeko aukera egin duten bikoteak izan dira.

Nafarroako Pirinioetan kokaturiko Aurizberri herriko Erreberena-Oihaneder etxean ere, jende ugari izan dute aurtengo udan. Bertatik pasatzen den Santiago bideak ere badu zerkusia horretan, Europako herrialde askotatik iritsitako ibiltariak hartu baitituzte etxean. Uztailan, gainera, beste urteetan baino %10 jende gehiago izan dituzte bertan, eta batez ere, bikoteak izan dira landa turismoko etxeak hautatu dituztenak.

Espainiako Estatistika Institutuak jakinarazi duenez, 6.615 pertsona izan ziren Nafarroako landa turismoko etxeetan ostatu hartu zutenak aurtengo uztaila bitartean, eta batez ere, euskaldunak izan dira bezero ohikoak haietan.

Ondoriorik garbiena, beraz, hau da: aurtan eguraldiaren eragina nabarmena izanik ere, turismoa ez duela erabat kalte-tu.